

gnificenza pol drizar el tutto a missier Antonio Zane de Tripoli.

Idio felice conservi vostra magnificenza. A di 19 Fevrer.

292<sup>b</sup> *Sumario di lettere date al Cayro, scrite a di 12 Marzo 1518 per Francesco de Batista, drizzate a sier Marco Dandolo dotor e cavalier capitano di Crete.*

Magnifico et clarissimo signor mio benignissimo. Do altre ho scrite mandate per via di Damiaata et Alexandria: per queste aviserò vostra magnificenza il successo da poi le precedente.

A di 19 Fevrer. Di note fo mandato via in cadena per questo signor Cayrbech uno rais Suliman, el qual fo capitano de l'armata che mandò el soldan Gauri in India contra l'armata de portogesi, a Damasco al Signor turco. Qual era stato de qui in prexon mexi tre in castelo, che ogni zorno sperava esser liberato per esser stà asegurado dal Signor turco essendo la sua persona de qui; el qual ge feze de bellissimoi presenti, et non saper la causa di la sua retention, la qual fo da poi el partir de qui dil Signor turco, et subito partito fu preso et tenuto in castelo in cadena fin sto zorno. Omo richissimo, ha portato de gran specie e zoie e tesoro assai del ditto paexe de l'India, e tutti li soi è venuti tutti richi di quelle parte, et si crede el Signor turco non li farà algun dispiazer; è uno signor molto da bene.

A di 22 dito. El Signor turco ha mandato uno suo capitano a far de qui la mostra de tutte le zente soe, che si atrovano de qui, sì janizari come spachi, e ozi ha comenziato a far le dite mostre de li spachi, et far scriver da novo el nome suo e di che paexe i sono, et se sono de nazione de zentilhomeni over se sono vilani del paexe suo. Et ha comenzato da la Romania e da la Natolia, e cussì andarà ogni zorno fazendo le mostre et far la deserizion quante zente a cavallo se atrova de qui, zoè quelli che hanno el soldo del Signor turco. Se dize che se trovano manco zente assai de quello credevano, et assai ne sono scampate via, et non se sa dove, ma se dubita siano andate da la bareta rossa.

A Tenen fe' cargar tre navilii de cristiani de orzo, mandati di Damiaata per forza per cargar orzo e fava, et vanno a Baruto per comandamento dil Signor turco; et discargato a Baruto, dia tornar in Damiaata et dia cargar robe di alcuni mercadanti per Rodi e Candia.

(1) La carta 291 \* è bianca.

A di dito. Se dize, per la venuta di questa carovana da la Mecha, che se li puol dar qualche fede, aver inteso li mercadanti di ditta carovana a la Mecha, la bareta rossa esser a quelli confini soi molto grosso. Dize aver fato doe parte di le sue zente, et vien per le Barie a la volta de Bagadet, et dize voler vegnir a ferir a uno loco de la Soria che se chiama Oms, ch'è tra Damasco et Aman. Et che dita bareta rossa ha schiopetieri assaissimi, ch'è una gran cosa a veder, da 25 in 30 milia, et sono in tutto che vien a queste bande da persone 150 milia da fati et più. Et dize de l'assalto a la volta de Tauris a li soi confini da 50 milia persone a la guardia di quel loco. Dize *etiam* ditti mercadanti che uno capo de arabi che stà a la Mecha, che se chiama Ilani, che sempre ha al suo comando da cavali 20 in 25 milia, tutti ben a cavallo, et è molto amico di la bareta rossa, et andava da lui in suo ajuto. L'è venuto uno da Malatia, che è loco de là di Aleppo zornate 6 in 7, che conferma la rota ha auto Benesuar signor dil paexe de Alidulli, et del bassà de la Caramania, et ha visto le zente che sono scampate a Malatia, che dize questa. De novo Benesuar diseno esser ferito e non morto, ma esser stà taiato a pezi gran zente de quelli di la bareta rossa, et ha recuperato tutte sue terre che per avanti el Signor turco ge aveva tolto.

Ozi, a di 25 dito, m'è stà dito da uno mio amico come l'è stà fato publice proclame per la terra che tutti li omeni che sono stà scriti al soldo dil Signor turco se debano meter in ordine, et star tutti apparecchiati de cavalecar quando li sarà dito. Et se alguno scamperà et sia trovato, sia subito impicato, cussì spachi come janizari, et ogni altra sorte de zente che sono, al soldo dil Signor turco. Queste zente partirà di qui fin 3 over 4 zorni, che sarà a di primo di Marzo. Se dize *etiam* el Signor turco se dia levar da Damasco con tutto il suo campo al mezo dil maradan suo, che son quasi a mezo di Marzo. Et alcuni turchi dize el Signor turco aver mandato parte dil suo campo verso Alepo. *Etiam* se dize per omeni degni di fede, el Signor turco aver scritto nel suo paexe a Constantinopoli, et aver mandato a domandar la sua armata, et vegna al golfo di la Giaza e Tripoli. Se dize *etiam* el Signor turco dar voxe di voler andar contra la bareta rossa; ma alcuni spachi e janizari me hanno dito el Signor turco voler al tutto passar et andar a Rodi, et ha fato tajar legnami zoè pini gran quantità nel suo paese, et ha fato condur el tutto a Constantinopoli et a Salenichi; è per portar con lui a Rodi per butar fuogo in la terra. Et *etiam* ha fato far mortari de trar in la terra da 30